

# ҮРНӘ КҮСЛ

Толгъа деер гарад  
Төгәлнъгдән эргәд хәләнәв.  
Дживр угагъас биш  
Джиргәд нисхәр седнәв.

Аль газрин агъар  
Иим сенр үнртәв?  
Альк худгин усн  
Иим әмтәхн амттав?

Унәртсн джирлгъатә теегм  
Ухагъим байсхдж сергәнә.  
— Манахс аашна, — гидж  
Маасхлздж инәсн болна.

Тенд — хол газрт  
Теегм, чамагъан санлав;  
Халун зүркнә зүтклиг  
Хәрү эвддж бәрләв.

Ухани билгин теегән  
Унтхларн зүүдндән үзләв;  
Хөөнлә көөлдсн болад  
Хәәкрәд сердг биләв.

Үүрән хәәсн шовуншнъ  
Үнн седкләрн ирләв;  
Чидлән, ухагъан, медлән  
Чамдан, теегм, өгнәв.

**БАЙДИН САНЪДЖ-АРА**